

SECONDA SESSIONE URDINARIA DI U 2021
RIUNIONE DI I 18 È 19 NOVEMBRE 2021

2EME SESSION ORDINAIRE DE 2021
REUNION DES 18 ET 19 NOVEMBRE 2021

2021/O2/045

**Question orale déposée par Monsieur Don Joseph LUCCIONI au nom du
Groupe « Fà Populu Inseme »**

Ughjettu : **Partecipazioni di a Corsica à a COP26 in Glasgow : Puntu
d'infurmazioni è prospettivi.**

O Sgiò Presidenti di u Cunsigliu esecutivu di Corsica,

L'8 di nuvembri scorsu, participaiati à a « COP26 » in Glasgow, da presidenti di a cummissioni « Transizioni ecologica » di l'Associu di i « Rughjoni di Francia ». Issa 26esima Cunfarenza di i Partiti di i Nazioni Uniti nantu à u cambiamentu climaticu, urganizata da u Reamu Unitu incù l'Italia, hà adunitu guasgi 200 Stati, da u 1ma à u 12 di nuvembri. Issa partecipazioni si scrivi in u cuntestu più largu di rilazioni internazionali, intratinuti dipu u 2015, da a maghjuria naziunalista sottu à a voscia azzioni (presidenza di a cummissioni di l'isuli di a Cunfarenza di i rughjoni periferichi è marittimi, partecipazioni à u « One Planet Summit », accordu bilaterali incù l'Euskadi...). S'edda custituisci un fiascu par unipochi di parsunalità pulitichi in u mondu, ci pari impurtanti d'intarrugà vi nantu à issu puntu.

Duranti issa cunfarenza, aveti pussutu cuntrastà incù unipochi di dirigenti pulitichi, frà i quali u ministru scussesu di a transizioni ecologica, Michael Matheson, a ministra francesa di a transizioni ecologica, Barbara Pompili, u raprisintenti di i cità è governi lucali africani, Jean-Pierre Elong Mbassi, o u Presidenti di a Catalogna, Pere Aragonés (incù quali vi seti intesu da travaglià nantu à un partinariatu, in ghjiru à a lotta contra u cambiamentu climaticu è à prò di u sviluppu durevuli, in u Mediterraniu).

Issa sonda v'hà parmissu di fà senta a voci di a Corsica è di purtà a so brama di participà, à u so liveddu incù umilità è ditarminazioni, à issu cuncertu internazionali nantu à una sfida tamanta di u nosciu seculu. Di modu più generali, seti intarvinutu da difenda u rolu di i tarritorii, in a lotta contru à u cambiamentu climaticu, ch'eddi

fussini rughjoni di drittu cumunu o Nazioni è populi senza Statu, ramintendu ch'è issu cumbattu ùn devi micca essa purtatu solu da i Stati. Di fattu, par avanzà, bisogna à metta in baddu pulitichi in u quadru d'una cuuparazioni dicentralizata à a scala di i tarritorii, vicinu à i cittadini è à i populi. A voscia prisenza hè stata dinò l'uccasioni di spiicà i sfidi di l'adattazioni à u cambiamentu climaticu in i tarritorii isulani, soprattuttu in u Mediterraniu.

Di fattu, l'ultimu raportu di u GIEC identificheghja u Mediterraniu com'è unu di i spazii i più minacciati di u pianeta. Spaziu strasurdinariu, u « *Mare nostrum* » ferma un locu minacciatu à u liveddu ambientali (ramintemu qu'è ch'eddu custituisce a prima conca turistica in u mondu). Simbulu di i disgrasti di u cambiamentu climaticu, hè risurtitu di i vosci scambii a vulintà cumuna da ch'è u Mediterraniu divintessi un mudelu pà a priservazioni di a biodiversità è u sviluppu durevuli. Tandù, oghji più ch'è mai, a cuuparazioni mediterranea hè un arnesi da mubilizà. Di più, i tarritorii isulani è cuntinintali ùn poni micca aduprà i listessi sistema. Hè par quissa ch'è aveti difesu l'appiicazioni più forti di l'articulu 174 di u Trattatu di l'Unioni aurupea, da piglià in cunsiderazioni u fattu isulanu in i pulitichi publichi.

Isula aurupea di u Mediterraniu, a Corsica ùn hè micca risparmiata da issi fenomeni ch'è mettini in priculu a biodiversità è l'ambienti : i fenomeni naturali si multiplicheghjani (sicchina, pieni, incendii, eruzioni di u litturali) è u nosciu patrimoniu naturali si trova di più in più toccu da l'azzioni di l'omu, soprattuttu in i zoni critichi (friquintazioni spatrunata è cuncintrata nantu à i siti sinsibuli, assenza storica d'un acconciu ammastratu di i spazii, carenza di gestioni di i mezzi...). In più, numarosi sò i sfidi ch'è c'aspettani : gestioni di u muddizzu, priservazioni di a risorza idrolica, prutezzioni è valorizzazioni di a biodiversità, pruduzioni energetica, impegnu à favori di u mari Mediterraniu incù l'insemi di i paesi, tarritorii è populi à sponde vicini, ughjittivu d'un turisimu durevuli. In cunfurmità incù l'ingaghjamenti presi davanti à u nosciu populu, aveti affirmatu a noscia ambizioni di fà di a Corsica una terra d'eccellenza ecologica è un mudellu in Auropa è u Mediterraniu in a strategia di lotta contru à u cambiamentu climaticu, intigrendu di modu priuritariu è sistematicu i sfidi ecologici in ogni pulitica publica. Azzioni numarosi sò dighjà stati rializati dipu a voscia presa di funzioni di dicembri di u 2015 inde issi duminii, à tal'puntu ch'è u nosciu paesi hè fighjulatu incù intaressu è simpatia à u liveddu aurupeu (u scontru incù u ministru scussesu n'hè una prova). Issi primi passi dumandani à essa ampliificati oghji è dumani.

Duranti a campagna alitturali, dichjaraiati ch'è i dui sfidi maestri di a nova mandatura erani a cuncretizzazioni di u nosciu prughjettu puliticu è a tramandera à a ghjuventù. In a lotta contru à u cambiamentu climaticu, pà l'ambienti è a biodiversità, hè oramai ghjunta l'ora d'intigrà di manera uparaziunali è concreta a lotta contru à u cambiamentu climaticu com'è una priurità di modu à trasmetta à i ghjenerazioni à vena una Corsica capifila in a lotta contru à u cambiamentu climaticu è un patrimoniu ambientali salvu.

Tandù, o sgiò Presidente di u Cunsigliu esecutivu di Corsica, a me dumanda hè quissa, qualessi sò i prospettivi, dopu à issa partecipazioni di a Corsica à a COP26, in quantu à l'azzioni cumuni pà a difesa di u clima ? Più largamenti, à ch'è ni semu di i nosci rilazioni internaziunali ?